

Yëkkuö tsá kit Pablo tö Timoteo a

1 Timoteo

Pablo tö yëkkuö kit mañat Jesús mik erblökwakpa wökirpa a, e' et e' dör itsá kiti tö Timoteo a e'. Yëkkuö i' dör ie' pattoie wes ie'pa kawötä s'wëttsuk s'wökirpaie.

Timoteo dör Pablo wapiöyuk ikanè a. Mik ie' bak duladula etä Pablo tö ie' klöo' kaneblok ie' ta. Timoteo bak senuk ká kiè Listra atë Asia ee. Ie' yé dör griegowak ena imì dör Israel aleri. Mik Pablo tö Jesús tté buaë paka' Listra etä Timoteo erblé' Jesús mik. E' ukuöki mik Pablo skà bak Listra etä ie' tö Timoteo shukit kaneblok ie' ta (Hechos 16.1-4). E' ukuöki Timoteo kaneblé' taijé Pablo ta Jesús tté buaë pakök ká kua'ki kua'ki a. E' ukuöki ta Timoteo bak Jesús mik erblökwakpa wëttsuk Éfeso. Pablo tö yëkkuö i' kit Timoteo a ie' kimoie wes ie' ké senuk kaneblok.

E' kíeta se' wése ké kaneblok Jesús mik erblökwakpa wökirpaie ena e'pa kimukwakpaie, e' kit Pablo tö Timoteo a. Nies Jesús mik erblökwakpa tso' Éfeso e'pa shua kabene tso' taijé. Pé' welepa tö s'wöbla'weke kache tté wa, esepa kí talarke taijé, e' ché Pablo tö Timoteo a tö wes ie' kawötä tté ese shulök.

Yëkkuö i' tö se' kimèmi taijé i'ñe ta. Yëkkuö i' tö se' a ikkachè tö se' wése kawötä shushtë s'wökirpaie, nies se' wése kawötä shushtë s'wökirpa kimukwakie. E' kíeta wes s'wökirpa ké kaneblok e' tso' kitule yëkkuö tsá kit Pablo tö Timoteo a e' kí.

Shke'wè

1 ¹ Ye' dör Pablo. Ye' dör Cristo Jesús ttekölpa tsá, e'pa eköl. Skököl dör S'tsatkökwak ena Cristo Jesús mik se' erblöke, e'pa ye' ka' kanè e' wà uk. ² A Timoteo, ye' tso' yëkkuö i' shtök be' a. Be' dör wes ye' alà chók es tté mik se' erblöke e' wa. Skököl dör S'yé ena Skëképa Cristo Jesús, as e'pa er buaë chò be' a ena be' saù er siarè wa nies sene bèrè mù be' a.

Se' wöbla'ukwakpa kache tté wa, esepa wöklö'ú

³Mik ye' minea Macedonia, eta ye' kköyè' be' a: "Be' e' tsuat Éfeso pè' welepa tso' e' e'pa a ichó tò kè s'wöbla'war kache tté wa." ⁴Ie'pa kawò chöke taiè se' ditséwö bak ká iaiaè e' tté pakè wa. Ttè e' kè erta'wa, e' dör ttè èse. Ichó ie'pa a tò kè yi wöbla'waria kache ttè ese wa. Ttè ese ki sulu s'nì chò. Ttè ese tò, ì weke Skèköl tò se' erblè ie' mik e' wa, ese wöklö'weke.

⁵Ye' ki ikiane tò s'yamipa ñì dalèritsò er maneneè wa, erbike bua' wa. Mik ie'pa ñì dalèritsò es, eta e' wa iwènewa tò mokì ie'pa erblöke Jesús mik. E' kuèki ye' tò be' ké s'wöbla'ukwakpa kache tté wa esepa wöklö'uk, kè kar s'wöbla'uk. ⁶Ie'pa welepa tò ttè mokì meát ta ittemirak biraraè. ⁷Ie'pa erkiöke s'wöbla'uk ttè dalöièno wa. Eré ipakekerakitò wes ichópa éna iwà anerak buaè es, eré iwákpa kè éna iwà ane.

⁸Se' wa ijcher tò ttè dalöièno e' dör buaè, erè se' kawöta iwà jchenukwa tò ì kuèki imeneat. ⁹Se' wa ijcher tò ttè dalöièno, e' kè meneat s'ser yésyèsè esepa shuloie. E' skéie imeneat wépa kè senak yésyèsè, wépa tò ttè dalösewékewa, wépa dör pè' sulusi, wépa e' wamblò sulu, wépa kè tò Skèköl ena ie' siwé dalöiè, wépa tò imi ö iyé ttèwa, wépa dör s'ttökwakpa, ¹⁰wépa trèr, wépa serke wépa ta alakölp skéie, wépa tò s'ditsò ekibleke watuè, wépa dör kachökwakpa, wépa tò s'kkateke kache wa, ñies wépa tò ì skà kè dör ttè yésyèsè sini'kuè ese wambleke, esepa kos shuloie ttè dalöièno meneat. ¹¹Es ttè buaè ichökle e' tò se' a ikkacheke. Ttè e' pakè kané me'at Skèköl kikauleka taiè, e' tò ye' ulà a.

Pablo tò wéstela ché Cristo a

¹²Skèképa Cristo Jesús tò ye' er diché ieke. Ie' isuéwa tò ye' ttò mokìè, e' kuèki ye' me'kaitò kanèblök ie' a. E' kuèki wéstela chèyö ie' a taiè.

¹³Ye' bak ie' chök suluè. Ñies ye' bak ie' ttökatapa chök suluè, we'ikök siarè. Erè Skèköl tò ye' sué er siarè wa, kam ye' erblò ie' mik e' kuèki. Ì wamblè' ye' tò ie' ta, e' wà kè ane ye' éna tò e' dör suluè, e' kuèki ie' tò ye' sué er siarè wa. ¹⁴Es Skèképa Jesús er buaè ché ye' a taiè shuté as ye' erblò ie' mik, ñies as ye' tò s'malepa dalèritsò buaè Cristo Jesús ttò wa.

¹⁵Cristo Jesús dé'bitü ká i' a pè' sulusipa tsatkök. Ttè e' dör yésyèsè je', sulitane ké iklö'uk. Ye' bak e' wamblök suluè sulitane tsata. ¹⁶Erè Skèköl tò ye' sué er siarè wa, ie' tò ye' tsatkée sulitane a ikkachoie tò kos Jesucristo tò se' dalé'ttseke enaè er bua' wa. Ie' tò iwé es as sulitane erblò Jesús mik wes ye' es ta sene michoè dò ie'pa ulà a. ¹⁷Skèköl dör s'blú yöbiè, kè duöta'wa, kè wërta'wa, e' dör eköl ème. iAs sulitane tò ie' dalöiò taiè, ie' kikhöka taiè kekraè!

¹⁸A Timoteo, be' dör wes ye' alà es, ye' tò be' ké iwakanéuk wes Skèköl tteköl tò iyè'bak be' a es. Be' e' tkówa darèrè wes ñippökwa

bua'buā ñippò es. ¹⁹Be' erbló michoë Jesús mik. Be' erbikò buaë e' wà iütó. Welepa kè wà ierbiikò buaë e' wà iütène, e' kuëkì ie'pa erblöke Jesús mik e' olo'yé ie'pa tò. ²⁰Esepa tso' böl kiè Himeneo ena Alejandro. Ie'pa méttṣa ye' tò Satanás ulà a as iwötkirdak tò Skëköl kè yërta' suluë.

Skëköl a ikiösö sulitane kî

2 ¹A Timoteo, ttè i' cheke ye' tò be' a e' dör ttè bua'ie: Jesús mik erblökwakpa kawötä Skëköl a ikiök sulitane kî kekraë. Ichó ie'pa a tò ie' a ikió tò ie' tò sulitane kîmè, ñies wëstela chó ie' a sulitane kî. ²Ie' a ikió wépa tso' se' blúpaie se' wökirpaie esepa kos kî as ie'pa s'wëttṣu buaë. Ie'pa tò iwé es, e' ta se' serdaë bèrè buaë Skëköl dalöiök è, kè ñi chöta' suluë. ³E' dör buaë, ñies iwër buaë Skëköl dör S'tṣatkökwa e' wa. ⁴Ie' kî ikiane tò sulitane tsatkër. Ñies ie' kî ikiane tò sulitane éna ttè mokîë e' wà ar. ⁵Ttè e' dör i' es:

Skëköl dör eköl ème.

Ñies wëm tso' eköl ème, e' tso' se' tté chök Skëköl a, e' dör Cristo Jesús.

⁶Ie' wák e' me'ttsabak ttèwä sulitane nuì skéie.

E' bak mik Skëköl tò ikéwö me'wä etä, as sulitane wä ijcher tò mokî ie' éna se' tsatkak.

⁷Ttè e' wà pakök Skëköl tò ye' klöo'bak Jesús ttekölpa tsá e'pa ekölie. Ie' tò ye' patké' pè' kè dör judiowak esepa wöbla'uk ttè mokî mik se' erblöke e' wa. I ché ye' tò e' dör mokîë, e' kè dör kache.

⁸Bitökicha a' ñi dapa'uke ká wa'ñe, etä ye' kî ikiane tò wépa ttò Skëköl ta er batse'r wa, kè ulune yi kî, kè ñi chöta'. ⁹Ñies ye' kî ikiane tò alakölpa e' paiò buaë, kè dör ichkà kkachök. Alakölpa kè kàne iyi tulökka taië itsà kî. Ñies ie'pa kè kàne e' kîtkökka taië iyi wönarke dalölöë oroie ñie ese wa. Datsi' tuë darërè ese kè iër e' ttsokä taië. ¹⁰E' skéie ie'pa ké e' kîtkökka i buaë wekerakitö ese wa wës alakölpa e' chò tò ie' tkëulewä darërè Skëköl ttè a esepa ké senuk es. ¹¹Ie'pa kawötä s'wöblarke e' kîttsoök bèrè dalöie wa. ¹²⁻¹⁴Skëköl tò Adán yö' kewe, e' ukuökî ta Eva yö'itö. Ñies Adán kè kîtène, Eva kîtène, es ie' tò Skëköl ttè dalösewä. E' kuëkî mik a' ñi dapa'uke Skëköl dalöiök, etä ye' kî ikiane tò alakölpa tulur bèrè. Ye' kè tò kawö mè ie'pa a s'wöbla'uk. Ñies ye' kè tò kawö mè ie'pa a e' alökka wépa kî. ¹⁵Erè alakölpa tò ila'r kaneweke buaë ena ierblöke Jesús mik ena s'dalëritseke ena iserke batse'r ena ierbiiköke buaë yësyësé e' kos a itkërie, e' ta itsatkërdarak.

Skëképa Jesús ichapa erule e'pa wökirpa

3 ¹Ttè i' dör yësyësé: Yi éna kaneblak Skëképa Jesús ichapa erule e'pa wökirie, e' ta ese éna kanè buaë wak. ²E' kuëkî esepa ké senuk yësyësé, kè kî i' sulu kuëpa yi tò ikkatoie. Esepa ké alaköl tsukwä eköl è, e'

dalöiök taië, kè kàne trè nuk. Esepa ké e' kkò' nuk buaë, kabikeitsök buaë, ñies senuk yësyësë as idalöiër. Esepa ké s'yamipa datse bānet, eseпа kiökwa buaë iu a. Esepa a buaë s'wöblar Skèköl ttè wa. ³Esepa kè kàne e' ttökka blo' wa. Esepa kè dör kèsik tsiriwetā', e' skéie ie' er buaë chò sulitane a ta iserke bèrè. Esepa kè er me'rie inuköl ki. ⁴Esepa dör iu wökir buaë. Ñies eseпа ala'r wöblane buaë ie' ttò dalöiök, ñies sulitane dalöiök. ⁵Esepa kè dör iwák u wökir buaë, e' ta ¿wes idömi Skèköl ichapa erule e'pa wökirie buaë? ⁶Wépa míwa erpa Skèköl ttè a, eseпа kè menukka s'wökirpaie dö' ie' tsòka taië ta iwömertsa weinuk wes bé es. ⁷Ñies e' wakpa ké senuk yësyësë as wépa kè dör Skèképa Jesús ichapa eseпа tó idalöiö. Kè dör es, e' ta ie'pa tó iwayuèmi ta ijaèrkami ta iarmine wes bé ki ikiane es.

Skèképa Jesús icha wökirpa e'pa kímukwakpa

⁸Es ñies Skèképa Jesús ichapa erule wökirpa e'pa kímukwakpa ké senuk yësyësë as idalöiër. Esepa ké ttök moki. Esepa kè kàne e' ttökka blo' wa. Esepa kè kàne inuköl klö'uk kache wa. ⁹Esepa ké e' tkökwa darèrè ttè mik se' erblöke kkayène se' a, e' a erbikè maneneé wa. ¹⁰Wépa merkeka iwökirpa kímukwakpaie, eseпа kawötā suè kewe tó is iserdak. Kè iki ì nuí ta', e' ta imerkami kímukwakpaie. ¹¹Esepa alakölpa ñies ké senuk buaë as idalöiër. E'pa kè kàne biyöblök, kè kàne e' ttökka blo' wa. E'pa ké ì kos uk yësyësë. ¹²Wépa kaneblak kímukwakpaie, eseпа ké alaköl tsukwa eköl ème, e' dalöiök taië, kè kàne trè nuk. Esepa wöblane buaë ila'r wëttsuk ñies ie' dör iwák u wökir buaë. ¹³Kímukwakpa tó iwakaneweke buaë, e' ta ie'pa dalöiërdaë, ñies Cristo Jesús tté mik se' erblöke, e' pakeraèitò kè jaëne.

Jesucristo siwé kkayè' Skèköl tó se' a

¹⁴Ye' mú mi' bet be' weblök. Ye' tso' yèkkuò i' shtök be' a ¹⁵dö' ye' wöklör etā be' wā ijcher tó wes se' dör Skèköl yamipaie eseпа kawötā senuk. Se' dör Skèköl chók e' ichapa, e'pa dör wes u chki bua'ie es ttè mokiè e' tsatkoie iwöklö'woie. ¹⁶Jesucristo siwé e' kkayè' Skèköl tó se' a, ttè e' dör mokiè buaë shutçë. Ttè e' dör i' es:

Jesucristo yöne s'ditsöie.

Ie' dör yësyësë e' kkayè' Skèköl Wiköl tò.

Ie' su' Skèköl biyöchökwakpa tò.

Ie' tté buaë e' pakane ká wa'ñe wakpa a.

Ie' mik pè' erblöke ká wa'ñe.

Ie' kinewā buaë ká jaì a olo ta' taië ee.

S'wöbla'ukwakpa kache tté wa

4 ¹Skèköl Wiköl tò ichè yësyësë tò mik ká i' erkewatke, etā taië pè' tò ierblò Jesús mik e' waterattsā. E' skéie ttè datse wimblupa tò

s'kitò'weke esepa wà ena aknamapa wà ese klò'wekerakitò. ²Pè' e' ò sulu kachò tajè erbikè burinewatke esepa iutekerakitò. ³Pè' ñe'sepa kè tò s'kè senukwa. Ñies ie'pa tò icheke tò chké wésele kè katar, kè ñar. Erè chké kòs me'atbak Skèkòl tò se' a katanoie ñanoie. E' kuèkì se' dör Jesús mik erblökwakpa wà ttè mokiè e' jcher, e'pa wà kawò tã' chké ulitane katök ñuk wèstela chekesò ie' a e' wa. ⁴⁻⁵Ì kòs yò' ie' tò e' dör buaè, kè se' kàne iwatòktsa. Chké kòs batse'ormi ie' ttè wa ena ie' a ikiè wa. E' kuèkì ie' a wèstela chésò iki, e' tã inèmisò.

Jesucristo kanè méso buaè

⁶Ttè ekkè wa be' tò se' yamipa wòbla'wé, e' tã be' döraè Cristo Jesús kanè méso buaè ese. Ñies iwènewa tò be' er diché iërke buaè ttè moki mik se' erblöke e' kòs wa. Ttè e' wà iutè'bitu be' tò buaè dò ikkè.

⁷Erè kapakè èse, kè wà tã', kè tò Skèkòl dalöiè, ese kòs kè iutar. E' skéie be' e' paulaú kekraè senuk wés Skèkòl kì ikiane es. ⁸Se' e' diché iöke e' pa kè'woie e' dör bërèbèrè buaè se' a ká i' kì è. Erè sene wés Skèkòl kì ikiane es, e' tò sene buaè shuteè e' meraè se' a ká i' kì ñies aishkuò tã. ⁹Ttè e' dör yèsyèsè, sulitane ké iklò'uk. ¹⁰Se' erblétke Skèkòl chók e' mik, e' kuèkì se' dobchöke darèrè kaneblök ie' a. Ie' dör sulitane tsatkökwak, erè bua'iewa ie' dör wépa erblé ie' mik esepa tsatkökwak.

¹¹Ttè ekkè wa s'yamipa wòbla'ú tã ikó iwà iutök. ¹²Kè be' e' muktsa watè be' dör duladula e' kuèkì. E' skéie be' ttò wa, be' ser wa, be' s'dalèritsè wa, be' erblò wa ena be' ser batse'r wa ikkachó s'malepa erblöke Jesús mik esepa a tò wés se' ké senuk. ¹³Kam ye' dò e' yöki be' e' chó Skèkòl yèkkuò aritsök s'yamipa a mik a' ñi dapa'uke etã. Ie'pa wòbla'ú iwa, ie'pa pattó iwa. ¹⁴Mik Skèképa Jesús icha e' wökirpa ulà me'kabak be' kì, etã Skèkòl ttekölpa tò iyè' be' a tò ì me' Wiköl Batse'r tò be' a kanebloie Skèkòl a, e' wakaneú ie' a buaè, kè iwe'ikar. ¹⁵Be' e' chó ttè ekkè kòs e' wakanéuk as sulitane tò isaù tò be' kí yörke buaè Cristo ttè wa. ¹⁶Wés be' ser ena wés s'wòbla'wèbö e' kkö'nú. Be' tò iwé es kekraè, e' tã be' ena wépa tò be' ttöke e' ttsé, e'pa kòs tsatkèrdaè.

Wés be' ké senuk Jesús mik erblökwakpa tã

5 ¹Wépa kèképatke esepa kè uñar kèsik wa, e' skéie ie'pa pattó er bua' wa wés s'yéwö es. Duladulapa pattó wés s'èlpa es. ²Es ñies alakölpa kèképatke, e' pattó wés s'mì es. Ñies busipa pattó wés s'kutapa es er yèsyèsè wa.

³Alakölpa schó siarèla, kè wà yi tã' e' kkö'nuk, esepa dalöió, esepa kkö'nú. ⁴Erè schópa wà ala'r tã' ö uyökpa tã' ö wì'chkepa tã' esepa ala'r ö isibayökpa kawòtã e' wòbla'uk iwìkèla ö imì atè siarè e' kkö'nuk imipa tò ie'pa kköna' e' skéie. E' wër buaè Skèkòl wa. ⁵Alakölpa schó kè wà yi tã' e' kkö'nuk, serke ekörla, morke Skèkòl è mik, ttöke ie' tã ñiè nañè,

ešepa kawōta kīmè. ⁶Erè alakōlpa schōpa e' mettsa ì sulu wamblök e' ttsè'woje buaè ešepa tso' ttsè'ka, erè Skèköl a ie'pa dör wēs s'duulewa es. Ešepa kè kawō ta' kīmè. ⁷Ttè e' wà iūtök s'yamipa kó as kè yi tō ì sulu kù ie'pa kī ikkatoie. ⁸Es yi kè tō iyamipa kkō'nè, kè tō iyamipa ekka kkō'nè bua'iewa, ese tō ttè mik se' erblöke e' watéttsa. Ie' dör suluè tkōka pè' kè erblōta' Jesús mik ešepa tsata.

⁹Alakōlpa schō kī duas de dabom teryök (60) ö kī ta, senewabak wēm eköl è ta, ešepa è kiè shtō kīmè. ¹⁰E' kīie ta ijcher sultane wā tō ie'pa s'kimeke buaè, ie'pa ala'r talao' buaè, ie'pa tō ipakōkwakpa datse bānet ešepa ki'wā buaè, kè ie'pa tkine kanè èse uk s'batse'r malepa kimoie, ñies s'weirke ešepa kimeke ie'pa tō, ie'pa e' muke íyi buaè kos ese uk e' waweke ie'pa tō. Alakōlpa schō ešepa kiè shtök se' kawōta yēkkuō kī ikimoie.

^{11,12}Erè alakōlpa schō kam kī duas dō dabom teryök (60) ešepa kiè kè shtar yēkkuō kī, ešepa kè kawōta kīmè. Ie'pa tō ichèmi Cristo a tō kè sa' serpawane, erè ie'pa erkiōwēne wēpa tō, e' ta ie'pa serdawane. Es ie'pa ttè me' kuaè, e' kè dalöiēne ie'pa wā, e' ta e' nuí atē ie'pa kī. E' kuekī ešepa kiè kè shtar yēkkuō kī as kè itkò ie'pa ta es. ¹³Ñies a' tō alakōlpa schō ešepa kīmè etā ie'pa bikērdakā taiē, michoē upakōk u èt u èt biyöblök suluè, e' tiū mir mir s'yamipa tsiriuk, ttè kè yēr ta' ese cherami shabatshabat. ¹⁴E' kuekī alakōlpa schō iā busipa, ešepa a ye' tō ichè tō a' senúwane, a' ala'r kōkane, a' wákpa u kaneú. Ie'pa tō iwé es etā pè' kè wōbatsö Jesús ttè wa e'pa kè tō se' chepa suluè. ¹⁵Alakōlpa schō welepa anemibakne Cristo ttè yökī tso'ne Satanás ttò iūtök, e' kuekī ye' tō ichè es.

¹⁶Alaköl isie dör Jesús mik erblökwa, e' yamipa alè dör alakōlpa schō, etā ie' kè ie'pa kkō'nuk as kanè e' kè arka Skèképa icha malepa kī. Es imalepa tō alakōlpa schō kè wā yi ta' e' kkō'nuk, ešepa kkō'nemi.

¹⁷Skèképa Jesús icha erule erule e'pa wōkirpa tō se' wēttsēke buaè, ešepa kawōta dalöie taiē patuè buaè. Ie'pa wēpa e' ché s'pattök s'wōbla'uk Skèköl ttè wa, ešepa kawōta pasuè bua'iewa. ¹⁸Skèköl yēkkuō tō ichè: “Baka wēñe tso' kanebloie trigo wōttsoie, e' kè kawō ta' kkō payuēwā itso' kaneblok e' dalewa as ie' tō trigowō katō.” Ñies ichèitō: “Kaneblökwa kawaōta patuè.” E' kuekī s'wōkirpa pasauk buaè se' kawōta.

¹⁹Yile debitu s'wōkirpa eköl kkatök, ese kè iutar. Erè mik idebiturak bōl mañal ikkatök ta' iché tō ie'pa tō isué, etā ttè e' wà chakó tō iyēne ö kè iyēne. ²⁰S'wōkirpa tō ì sulu wamblekeia, kè éna ilo'yak, ešepa wōuñú s'yamipa ulitane wōrkī as imalepa suarka ta' ie'pa kè tō íyi sulu wamblō.

²¹Ye' tō be' a' icheke Skèköl wōrkī ñies Jesucristo wōrkī ñies Skèköl biyöchökwakpa shukitule e'pa wōrkī tō ttè ekkēpa wà iutó ñikkē s'wōkirpa ulitane ta. Ie'pa saú ñikkē. ²²Kè yi marka betbet s'wōkirie.

Mik be' tō imekeka, etā iwà bikeitsówa buaë kewe. Wēm tō ì sulu wamblé, ese mékabō s'wōkirie e' tã ie'pa tō ichèmi tō be' tso' ie' pabakök. Ñies be' sueraë suluë ie'pa tō. Be' e' kkō'nú batse'r ì sulu kos e' yöki.

²³ Be' shü dalër ñië, e' kueki kè be' kàne di' è yök. Mikle tã vino yó elkela kapöliie.

²⁴ Ì sulu wambleke welepa tō ese jcherwa sulitane wã bet, kam ishulir e' yöki. Erè ì sulu skà tso' ese kè jcherwa yi wã dò aishkuö tã mik ishuline etã. ²⁵ Es ñies ì buaë wëkesö ese wërwa bet. Erè kè iwène bet, e' tã iwërdaë aishkuö tã, kè iblë nuk. E' kueki kè yi markã betbet s'wōkirie kam iwà bikeitswa buaë e' yöki.

6 ¹ Wépa tso' klöulewã kanè mésoie, esepa a ichó tō ie'pa kawöta iwōkirpa dalöiök er bua' wa as iwōkirpa kè tō Skëköl chò suluë, ñies as ie'pa kè tō ttè buaë wa se' tō s'wōbla'weke, e' chò suluë. ² Ie'pa wōkirpa dör Jesús mik erblökwapka, e' tã ie'pa kè kàne idalöseukwã, ie'pa de ñi yamiie Jesús ttè wa e' kueki. E' skéie ie'pa ké kanëblök bua'iewã. E' wã dör tō iwōkirpa dör ñies Jesús mik erblökwapka. Ie'pa dör ñi yamipa ñi dalër taië. Ttè ekkè wa s'wōbla'ú, ichó sulitane a tō iütó.

Se' er me'rie inuköl ki, e' dör suluë

³ Ttè buaë wa se' wōbla' Skëképa Jesucristo tō, e' tō se' a ikkacheke tō wës seneke yësyësë Skëköl a. Ttè e' wa se' tō s'wōbla'weke. Yile tso' s'wōbla'uk ttè kuã'ki wa, kè dör wës ttè wa se' tō s'wōbla'weke es, ⁴ e' tã ie' e' ttsökã taië, erè ie' kè wã ì jcher yës. Ttè kè wã tã, ese è tso' ie'pa er a, e' kabewekerakitö ñië se' tsiriwoie. Wépa tō ie'pa ttè iuteke, esepa ukyërke s'malepa tã, ñi blabatsökëlor, ñi chöke suluë ena ñi bikeitsöke suluë. ⁵ Këkraë ñi tsiriukerak ttè kueki. S'wōbla'ukwapka ttè kuã'ki wa, esepa er me'rie ì sulu è ki. Ttè moki ese kè ku'ia ie'pa wã. Ie'pa tō ttè kuã'ki pakeke e' blu'woie ème. ⁶⁻⁷ Erè ye' tō a' a ichè tō mik se' kune, etã se' kè wã ì dë'ka. Ñies mik se' blënewã, etã kè se' wã ì mine yës. E' kueki se' serke yësyësë wës Skëköl ki ikiane es ena se' ttsë'r buaë, ì tso' se' wã e' è wa, e' tã e' dör buaë shütë se' a inuköl taië tsata. ⁸ E' kueki se' wã chkè tã datsi' tã, e' tã se' ké ttsë'nuk buaë, e' dör wë' se' a. ⁹ E' skéie wépa e' blu'wakã taië, esepa erkirke ì sulu wamblök tã ñanemine ì sulu ulã a wës dúla klörwã sho' a es. Ie'pa klöulewã sene sulu a, eré ese tō ie'pa sulu'weke, erè ie'pa tō iwawekeia, bata ekkè tã ie'pa yilitewã idikia weinuk. ¹⁰ Inuköl dalër s'ëna e' dör ì sulu tsãkië e' wì. Welepa tō inuköl kkecheke taië, e' ukuömik ttè mik se' erblöke e' olo'yërakitö tã iweirke eriarke siarë.

Pablo tō Timoteo bata patté

¹¹ Erè be' dör Skëköl kanè méso buaë. Be' e' skóttsa ì sulu kos ekkè yöki. E' skéie be' e' chó senuk yësyësë wës Skëköl ki ikiane es. Be' erbló

Jesús mik kekraë. S'malepa dalëritsó. Be' weirke kos e' dalë'ttsó er bua' wa. S'malepa saü er bua' wa. ¹²Be' erblöke Jesús tté buaë e' mik, e' kuëki be' e' tkówa darërë ñippök ì sulu datse be' ki e' ta. Mik be' erblë Jesús mik kuaë, eta e' yë'ka be' tò pë' tso' tajë e' kukua. E' këwö ska' ta Skëköl tò be' klöo'bak senuk michoë ie' ta, ttè e' mik be' e' klö'ú darërëë kekraë, kè arwa as iwà dò be' ulà a. ¹³Skëköl dör sene mukwak e' wörki, ñies Cristo Jesús e' tsatkë ttè moki wa Poncio Pilato ska', e' wörki ye' tò be' a iché tò ¹⁴ì uk ye' tò be' kè e' wà iutó yësyësë as kè yi tò ì sulu kü be' ki be' kkatoie dò mik Skëkëpa Jesucristo datskene olo ta' tajë eta. ¹⁵Mik ikëwö de, eta Skëköl tò Jesucristo patkerane kkachë sulitane a.

Skëköl kikarkeka tajë,
e' eköl è dör íyi ulitane tsata.

Ie' dör blu'pa kos e'pa Blú
ena skëkölpá kos e'pa Këköl.

¹⁶ ¡Ie' eköl è kè duöta'wa!

Ie' serke ie' olo ta' tajë e' shua,
kè yi döpawa e' ska'.

Kè yi wa ie' suule iwöbla wa,
ñies kè yi a ie' sunukwa.

¡Ie' è kawöta kikëka kekraë!

¡Ie' è diché ta' tajë kekraë! ¡Es e' idir!

¹⁷A Timoteo, inuköl blúpa a ichó tò ie'pa kè kàne e' ttsökka tajë. Inuköl erta'wa, chöta'wa e' kuëki ichó ie'pa a tò ie'pa kè kàne e' maukka inuköl mik. E' skéie ie'pa a ichó tò a' e' maúka Skëköl è mik. Ie' tò se' a íyi buaë meke tajë senoie, se' ttsé'woie buaë. ¹⁸Ichó ie'pa a tò ì buaë ú tajë s'kimöie. A' kè kàne kkë'blök. S'kímú a' inuköl wa er bua' wa. ¹⁹Ie'pa tò iwé es, e' ta iské merane buaë Skëköl tò ie'pa a aishkuö ta. Es sene chökle e' döraë ie'pa ulà a.

Pablo e' chéat

²⁰A Timoteo, Skëköl tté buaë mène be' ulà a, e' wakaneú er moki wa. Kapakè kè wà ta', kè dör Skëköl dalöioie, ese kos yöki be' e' skóttsa. Ie'pa wákpa tò iché tò e' dör ttè mokië. Ie' chörak tò ie'pa wa íyi jcher tajë, erë e' dör kache. ²¹Se' wëlepa tò iché tò ttè ese sini'kuérakitó ta ttè mik se' erblöke e' olo'yérakitó. E' kuëki be' e' skóttsa bánet ttè ese kos yöki.

As Skëköl er buaë chò a' ulitane a.